

Машхура УСМОНОВА



ОҚ
ЖАБУМАР

-ХИКОЯЛАР-



“Фарғона” нашриёти-2005

84(55) 6-44 Бадийи ҳаҷабиёт

Машхура Усмонова.

Оқ кабутар. (Ҳикоялар).

“Фарғона” нашриёти, 2005, 24 бет.

31678
10 0

© М.Усмонова, “Фарғона” нашриёти

20.05	Alisher Navoiy
36.34	nomidagi
A	O'zbekiston Mif.

АРМОН

ДАЛА. Күз илгамас кенгликлар. Тупроқ йўлда эса илон излари шундоққина кўзга ташланади.

-Дадажон етиб келдикми? - деди соchlари жамалак, ўзи ҳам қорамагиз қизалоқ отасининг қўлларига ёпишиб.

-Ха, она қизим. Етиб келдик. Кўрдингми, ҳў ана, самолёт. Қанотлари катта, осмонга учади, - деди Рашидбек овозини кўтарганча.

-Вой, осмонга учади? Қандай қилиб? Биз ҳам учамиза?!

-Учамиз, учамиз, қизим.

Рашидбек қизининг соchlарини силаб қўйди-да, узоқларга тикилиб қолди. Даланинг ҳавоси ўзгача. Уч-тўрт чақирим нарида - бир томони пахтазор бўлган ерда дехқончилик қилади. Ёмон эмас, тирикчилик ўтиб турибди, элдан кам бўлгани йўқ. Олти боласи бор. Хотини ҳам меҳрибон. Шукур, катта қизини узатди. Иккинчиси бу йил институтга кирди. Қолганлари ҳам эсли-ҳушли, мактабда аълочи бари. Етимлик билан катта бўлганди, ўзи. Худо ҳамма нарсани беряпти. Аммо “Етдим деганда йиқилмасам, бўлдида!”, - У шундай деганча кўкси аралаш қорнини силаб қўйди. Унинг худди шу ерида қаттиқ оғриқ бўлмаса-да қандайдир нохушлик бор эди. Овқат едими, ташлайди. Мана энди сув ичса ҳам ҳазм бўлмаяпти. Ишқилиб, шу болаларнинг баҳтига жони омон бўлсин-да. Айниқса, мана шу кенжатоий учун!

-Дада, дада, - деди Шаҳло бидирлаб. - Самолётда учайлик!

Рашидбекнинг хаёли тумандек тарқаб кетди.

-Юр, бир илтимос қилиб кўрамиз, - деди у қувноқлик билан. Аммо улар етиб боргунча пахта даласига дори сепишга тайёрланиб турган самолёт бир оз югуриб бордию осмонга учиб кетди. Шаҳло ҳайрат тўла кўзлари билан унга тикилиб қолганди.

-Кўрқма қизим. Самолёт дегани шу. Ҳозир яна қайтиб келади. Кейин биз ҳам чиқиб учамиз, бирга. Рашидбек худди

шу сўзларни айтдию, кўнгли беҳузур бўлиб қайт қила бошлади. Хаёлидан “докторга учрамасам бўлмайди, шекилли”, - деган ўй ўтди...

Шифохонанинг тор йўлаклари. Бошларига оқ боғич боғлаб олган Шаҳлонинг юраги қинидан чиқкудек дук-дук уради. Гўё ўзи ҳам қушдек енгил. Ахир бугун меҳрибон дадажонисини кўради-да, Даданг касал, - деб уларни шунча кун кўрсатишмади. Бугун эса, байрам. Бугун уйга олиб кетарканмиз. Энди зўр-да! Ҳаммамиз яна бирга бўламиз! - У шу сўзларни пицирлаб айтганча Рашидбек ётган хона эшигини очди. Кўзлари қизарган онаси деди:

-Кел, қизим, келақол. Дадангни кўриб олгин.

Шаҳло хурсанд бўлганча ичкарига қадам қўйди. Каттагина каровот. Унда озиб-тўзиб кетган Рашидбек ҳушсиз, кўзлари юмуқ ҳолда ётарди. Қўлларига игналар санчилган. Шаҳло қўрқиб кетди. -Йўқ, бу дадаммас!, - деди бақириб. Дадамни, дадажонимни топиб беринглар, менга. Қани мени дадам?!!! Шаҳло ташқарига отилиб чиқиб кетмоқчи эди, ойиси унинг қўлларидан тутди.

-Шошма қизим. Бу сенинг даданг. Ҳозир касал-да. Ўшанга танимадинг, қизалогим...

Онаси Шаҳлони каровот олдига етаклаб борди.

-Дадаси, ҳой дадаси, Шаҳло келди, - деди пицирлаб. Бироз ўтгандан сўнг унинг қўллари қимиirlаб, кўзларини очди. Дадаси эканлигини билган Шаҳло баттар йиглаб юборди. Шунда Рашидбек:

-Йиглама, - деди зўргагина. Шаҳло энди анча ўзига келиб олган эди.

-Дадажон, дадажон!

-Қизим!

Рашидбек жуда ҳолсиз эди. У шу дамда қизалогини эркалаторлас, ҳатто бирор сўз айтишга ҳам мадори йўқ. Унинг кўзлари ёшланди. Жовдираган қизчаси ҳамон унга ҳайрат ила боқиб турарди. Рашидбекнинг ичидаги нимадир “чирт” этиб узилгандай бўлди. “Эссиз бахти ярим экан бу етимчани. Ўзи-ку, ота-она меҳрисиз улғайган эди. Энди, худонинг иродаси билан ёш умри ҳазон бўлиб кетмоқда.

“Оғзи ошга етганда, боши тошга тегибди”, деганлари шу бўлса керак-да! Дарди давосиз. Умри қанча қолгани ноаниқ. Рак экан. Рак!!!

Бу дард қандай илашди, ҳамма ҳайрон. Начора, кўнмоқдан ўзга йўл йўқ. Аслида бир бошга бир ўлим. Аммо гўдаклар ҳоли не кечаркин. -Дадажон, дадажон, - деган майнин овоз келди узоқлардан. -Қизим, қизалогим, - деди Рашидбек ҳам зўргагина.

-Дада, юринг самолётда учамиз, туриңг ўрнингиздан, турा қолинг, - деди Шаҳло кўзидаги ёшни артиб. Рашидбек кўлларини кўтариб, қизасининг сочини силамоқчи бўлди. Аммо кўтаришга куч қайда? Бир пайтлар тогни урса талқон қилувчи қўллар мадорсиз эди, ҳозир. Бир ой тўлмай касаллик емириб ташлади. Аслида етилиб қолган экан-да!

-Учамиз қизим, албатта учамиз. Фақат ҳозир бошқа ёққа учеб кетяпман. Бошқа ёқларга. Сен эса ақлли қизча бўлгин, а...

Рашидбекнинг томогига нимадир тиқилиб бўғилгандай бўлди. У шошганча хотинига имо қилиб қизининг пешонасининг яқинроқ келтиришини сўради. Онаизор бу илтимосини бажо келтирди. Рашидбек қизининг пешонасидан ўпар экан “Бахтли бўл”, - деди пичирлаб. Ва “оғзингни оч”, дея имлади Шаҳлони. Унинг оғзига пуфлаб қўйгандай бўлди. Тобора нафаси қисиб борар, қўзлари хиralашиб, осмонларга учеб кетаётгандай эди.

У сўнгги бор қизи, хотини, яқинларига қаради. “Алвидо”, - дегандай қўзларини очиб юмди. Шаҳлони хонадан олиб кетинглар, дегандай қўлларини қимиirlатди. Буни сезган Шаҳло дод солганча отасининг қўлларига ёпишиб олди.

-Дадажон, самолётда учеб кетманг. Майли мен ҳам учмайман дадажоним, - дерди бақириб. Аммо меҳрибон отажонисининг бир ўмрга узоқларга учеб кетганини ҳатто тушунолмасди ҳам.

ОППОҚ КАБУТАР

КЕНГГИНА ҳовлига баланд қилиб солинган иморатлар жим-житлик қучогига сингиб кетгандай! Ҳамма оёқ учида юради, шивирлаб гаплашади. Ҳатто ҳар доим ҳуриб, ҳовлини бошига күтарадиган Тарзан ҳам хомуш. Бошини икки оёгининг брасига олганча каттакон дераза олдида ётибди. Тез-тез дераза томонга қараб, қулоқларини қимирлатиб қўяди. Худди шу пайт ичкаридан қадам товуши эшитилди. Юзлари анчагина шишикқан, уйқусизликдан кўзлари қизарган Ботиржон “үф” тортганча дарвоза томонга қараб йўл олди. У докторни кутаётган эди. Бироз вақт ўтгач, чамадонча кўтарган доктор ва Ботиржон шошиб уй ичига кириб кетишиди.

Оппоқ чойшаб солинган ўринда беш-олти яшар атрофидаги Бобур иситмага куйиб ётарди.

- Ҳа, полвон. Нима бўлди? - деди доктор ҳазиллашиб Бобурга. Унинг ўрнига отаси Ботиржон:

- Кўрмайсизми, икки кундан бери аҳвол шу. Иситма чиқиб безовта қиляпти. У қилдик, бу қилдик, фойдаси йўқ, - деди куйиниб.

- Хўш йигитча, қани, буни қўлтиғингга тиқ-чи.

У қўлидаги иссиқ ўлчагични Бобурга тутқазди. Чиндан иссиғи баланд, эди, боланинг. Доктор дарров укол тайёрлай бошлади. буни кўрган Бобурнинг ранги оқарди. Қийратганча игна санчдилар, унга.

Орадан уч соат ўтди ҳамки, ўзгариш йўқ. Бобур тобора иссиғи кўтарилиб алаҳсирай бошлади. “Кабутарим, беринг уни”, - дерди инграницаб. Ботиржоннинг боши қотиб қолди. Яна бояги докторни етаклаб келди.

- Ия, боланинг аҳволи чатоқ-ку! Қани тез бўлинглар, шифохонага олиб борамиз, - деди доктор Бобурнинг пешонасини ушлаб. Ботиржон бу гапдан шошиб қолди. У нима қилаётганини билмас “Шоҳида, тез нарсаларни тайёрла”, - деб хотинига гулдурарди, холос. Худди шу пайт Бобур “Кабутаримни беринг, беринг”, - деб яна алаҳсирай

бошлади.

- Қанақа кабутар, - деди доктор ҳайрон бўлганча.

Ботиржон эса “шунчаки уйдаги кабутар-да”, - деб қўя қолди. Аммо доктор тажрибали эди.

- Ўша кабутар қандай, кимники эди? - деди саволини тақорлаб. Унинг қиёфаси шу дамда жуда жиддий эди. Ботиржон унинг юзини кўриб бироз ўзини босиб олди-ю, икки кун олдинги воқеани эслади.

Ботиржон кабутар ишқибози. Бўш қолди дегунча ҳовли этагига чопади. Томга чиқади. Ҳуштак чалиб элликдан ортиқ кабутарларни осмону фалакка учиради. Бу унинг севимли машғулоти. Олти яшар ўғли Бобур ҳам ота ўғил-да! Тўғрироғи, унинг тап-тайёр думи. Ерда бўлса ерда, томга чиқса яна ёнида-да! Ўзича ҳуштак чалиб қийқиради, “гули-гули”, - деб овоз чиқариб кабутарларга дон сепади. Айниқса думлари узун, тумшуғи сал қайрилган оқ кабутар унинг жонидили. Жонивор ҳам унга ўрганган. Ҳовли саҳнида пайдо бўлиб “кули-кули” деб қичқириши билан галасидан ажралиб келиб унинг олдига қўнади. Бола унга дон беради. Кичиккина қўллари билан бошини силаганини кўриб Ботиржон ўғлининг қилиғидан хурсанд бўлиб қўяди. Ахир қушларни севган инсоннинг қалбида ёмонлик уруғи ниш урмаслигини жуда яҳши билади-да!

Ўша куни энг яқин дўсти Равшан иккита сумкани тўлдирганча уйга кириб келди.

- Эй, ошна, юрибсанми? Бормисан, бу дунёда, - деди икки дўст бир-бирига. Улар жуда қалин, ораларидан қил ўтмасди. Равшан эндиғина солинган кўрпачага ўтирумай туриб муддаога кўчиб қўяқолди.

- Ботир, тез кетаман. Шошиб турибман ўзи. Битта илтимос билан келдим. Биласан, бугун ўғлимнинг туғилган куни. Кабутар олиб келаман, деб ваъда бергандим. Ўшанг...

Ботир дўстининг илтимосини тез тушунди. Чордоқقا чиқиб ёққанини танлаб ол, дўстим, - деди у. Мәҳмон ҳовли этагидаги том чордогига чиқди. Равшан кабутарлар ичидан битта оқ, битта қора кабутарни ушлаб олди. Ҳадя қилинган кабутарларнинг бири Бобурнинг ўша севимли кабутари эди.

Буни қўй, бошқасини ол, дегани истиҳола қилди Ботиржон.

Бобур доимидай кўчадан ўйноқлаб кирганча кабутарлари ёнига келди. “Ғули-ғули” қилиб уларга дон соча бошлади. Аммо кўзлари безовта. Уёқдан-буёққа зир-зир югурар, гоҳ томга чиқиб улар қўниб турадиган дорходага қараб тушарди. Аввалига ўғлининг бу қилиғига кулиб қўйган ота гап нимадалигини фаҳмлаган эди.

- Бобур, кабутарингни Равшан амакинг ўғлига олиб кетди. Унинг туғилган куни экан, - деди Бобурнинг бошини силаб. Бобур дадасининг бу сўзларини эшитиб қошларини чимирди, йиғлаб юборай деганча уйга кириб кетди. Худди шу куни тунда унинг иссиги кўтарилиган эди.

Доктор Ботиржоннинг бу сўзларини эшитиб ўйланиб қолди. Кейин қошларини чимирганча:

- Ука, энди сиз дўстингизникига бориб ўша қушни олиб келасиз. Йўқса, Бобуржоннинг иссиги тушмайди.

Гап нимадалигини фаҳмлаган Ботиржон эътиборсизлик қилгани учун ўзини койиган кўйи шошганча дўстининг уйига отланди. Бироқ ҳовлига чиқибоқ қичқириб юборди: - Бобуржон, қара кабутаринг қайтиб келибди! Ана у!

Бироз ўзига келиб кўзларини очган Бобуржоннинг нигоҳи дераза ортида - сўритокда турган ўзининг оппоқ кабутарига тушди. Бобуржон суюниб кетди.

Бироздан кейин эса, дадаси кўмагида ҳовлига чиққан бола қўлига келиб қўнган кабутарни эркалай бошлади. Ўзини анча яхши ҳис қилаётганди шу дамда.

Яна тоинг. Кичкина Бобур дўймбоққина қўллари билан оқ кабутарига дон сепади. Ора-орада “ғули-ғули”, - деб овоз ҳам чиқариб қўяди. Ўғлига тикилиб турган Ботиржон кўзларига ёш олганча “Етти мучанг омон бўлсин, ўғлим” - деди пичирлаб. Худди шу дам ўғлининг севимли кабутари унинг бошидан уч бор айланганча осмону фалакка кўтарилиди.

ТУХМАТ ТОШИ

МАКТАБ ҳовлиси қий-чувга тўлиб ётибди. Ҳамма хурсанд. Айниқса йигитларнинг оғзи қулогида. Қизлар ҳам улардан кам эмас. Ахир бугун ҳамма қанот чиқарганча кенг пахтазор томон йўл олмоқда. “Ура-ура” - билан кровату, кўрла-тўшакларни катта машиналарга юклаб бўлишди. Кейин барча автобусларга чиқиб ўрнашиб олдик.

- Райхон, сувинг борми? - деди синфдошим Барно.

- Йўқ, - дедим беихтиёр кўрслик билан. Негадир Барнони жиним ёқтирумас, ўзи ҳам жуда тортинчоқ, камсуқум қиз эди. Бечора қўпол муомаламдан сўнг индамай қолди.

Йўлга чиқдик. Манзил анчагина олис зкан. Ҳаммамиз қийқириб-қийқириб чарчадик шекилли, бироз тинчиб қолдик. Шундагина кўзим дераза ойнасига тикилганча чуқур хаёлга чўмиб қолган Барнога тушди. Узоқ кузатдим. Биз ётоқхонага боргунимизга қадар маъюс нигоҳлари бир нуқтага қадалганча жим кетди. Юрагим ачишгандай эди. Бироқ бу узоқ давом этгани йўқ. Шўхлигим сабаб яна қий-чувлар уммонига чўкиб кетдим.

Ётоқхона. Қатор териб қўйилган кроватлар устига оппоқ тўшаклар тўшалган. Фақат каттакон залнинг бир чеккасида Барно ўз кўрпасини ерга солишга ҳаракат қиласарди. “Эссиз, кровати йўқ экан-да?”

Яна шўхликлар, қий-чув. ҳамма синфдош қизлар ўзлари билан олиб келган ноз-неъматларини ўртага қўя бошладилар. Аммо Барно дастурхон атрофига яқинлашай демасди. Уни қанча чақирсан ҳам яқин йўламади.

Кенг пахтазор. Куни билан пахта терамиз. Ҳамма ҳар хил. Аммо Барно жуда эпчил экан, барчадан кўп теради. Чиройи ҳам бироз очилиб қолган. Назаримда синфдошларга кўшилгандай эди.

- Райхон, шу писмиқни ҳеч ёқтирумайман-да, - деди яқин дугонам Гуласал.

- Нимага? - дедим ҳайрон бўлганча.

- Билмадим-у, қўли бироз эгрироққа ўхшайди.

- Нимага ундаі дейсан? - дедім қизиқиб.

- Ёстиғим тағига қанд-қурс беркитгандым, камайиб қолгандай, - деді Гуласал қошларини чимирганча. Унинг сүзларига кулиб юбордим. Ҳазил қилаётган бұлса керак деб үйладиму ишимни давом эттиравердим. Үзи Гуласал жуда ҳазилкаш, бироз үткірроқ, ҳасадчироқ зди. Барно эса қаторасига икки беш кунликда мақтөв ёрлиқ ва пул мукофоти олғанды, шунга ғайирлиги келди шекилли. Аммо бу гап кечга бориб қызлар орасида тарқаб кетди. Ҳамма Барнога ғалати қарай бошлади. Бироқ бу ҳолва экан.

Уйга бориб келиш навбати етган Барно менинг олдимга келиб:

- Райхон, ойим бетоблар... Икки-уч кун келолмасам керак, - деді ҳазин товуш билан. У негадир одамови бўлиб қолганди, яна.

Теримга чиққанимизга бир ойча бўлди. Биз тераётган майдонларда чаноқлар анча бўшаб қолган. Шундай бўлсада чарчоқ нима билмаймиз.

Ётогимизга етиб олсак бас, ювиниб-таранамизу, ўйин-кулгуга ошиқамиз.

Бу кеч хонандалар келадиган кун. Ва ниҳоят анча кўникиб қолган ётоқхонага келдик. Барнонинг ерга тўшалган жойи йигиштириб қўйилган. Ўрни бўм-бўш. Бор-йўқлиги билинмайди ҳам.

Бироз ўзимизга оро бериб ташқарига чиқиб кетаётган эдик, Гуласалнинг қийқирган овози қулогим остида жаранглади.

- Вой, мени сирғам йўқ, қызлар. Ҳаммамиз “ялт” этиб Гуласал томон қарадик. Унинг жовдираб турган кўзлари ёшга тўлган зди.

- Тилла сирғаларимни эрталаб сумкамга солиб кетувдим.

Бир зумда ўқитувчиларимиз етиб келишди.

- Тинчликми, Гуласал? Нима бўлди?

- Сирғам... У шундай деганча йиғлаб юборди. Ҳамма ҳайрон. Бирдан Гуласал сакраб ўрнидан турди-да, овозини борича:

- Уни ким олганини биламан. Ўғри. Бугун уйига

кетаётганды олиб кетган!

Ҳамманинг хаёлига Барно келди. Гуласал аввал ҳам унинг “қўли қинғир”, эканлигини билиб юрганди. Энди ҳаммаси равшан. Барнони эртасига барчамиз кутдик. Аммо келмади. Унинг “Ойим бетоблар”, - дегани жаҳл устида хаёлимдан кўтарилиб кетган эди. Гуласал жанжал қилиб Барноларнинг уйига бориб келди. Ҳатто ўқитувчилар тинч ўтирганлари йўқ. Ҳамманинг оғзида Барно. У қип-қизил ўғри эди.

Ниҳоят далаларда пахта тугаб ортга қайтдик. Аммо Барно мактабга қайтиб келмади. У уялиб бошқа мактабга ўтиб кетган экан.

Қиши ортда қолиб, баҳор атрофга сепини ёйиб ташлаган. Оғир пўстинларни ечиб, анча енгиллаб қолгандик. Наврўз арафасида Гуласални уйларига чақириб боргандим, ойиси чиқиб келди.

- Вой, кел Райхона. Қани ичкарига кир, - деди қучоқ очиб сўрашар экан. Аммо шу дам кўзларимдан ўт чақнагандай эди. Ниҳоҳларим Зарифа опанинг қулоқларида. Унда бир жуфт исирға нур таратарди. Бу ўша, Гуласал пахтада “йўқотдим”, - деган сирға. Худди шу дам ўша кун тонгдаги манзара кўз олимга келди. Иш кийимларини кияётган Гуласалнинг қулоқларида сирғаси бор эди-ку. “Ўз кўзларим билан кўргандим-а?! Наҳот у шундай разилликка борса? Бир инсон бошини кўпчилик олдида зигиб, шаънига ювса кетмайдиган дод солса?” Худди шу пайт ичкаридан Гуласал очилиб-сочилиб чиқиб келди. Мен эса... Худди жирканч маҳлукни кўргандай ижирғаниб қарадиму, овозимни кўтариб: - Гуласал исирғанг йўқолмаган экан-у, Нега Барнони ўғри қилдинг? - дедим.

- Нима? Қандақа исирға, - дея савол берди Зарифа опа.

- Қизингиз, бечора Барнони ўғрига чиқариб, шарманда қилди-ку!?

- Вой, шўрим. Гуласал бу нима қилганинг? Ахир буни таққим йўқ, дегандинг-ку?!

Мен эса ғазаб билан ташқарига йўл олдим. Тўғри

келдим-да, бор ҳақиқатни синфдошларимга айтиб бердим. Ҳамма ғазабда. Барчамиз йигилиб қүшни мактаб томон йўл олдик. У ерда ҳам байрам экан. Кўзимиз эса Барнога тушди. У жуда ўзгарибди. Чиройли, юzlаридаги табассум. Аммо бизни кўриб ранги ўзгарди. Бунинг сабаби аниқ. Аммо қучоқ очиб кўришдик у билан. У хурсанд бўлди. Айтишича, қандайдир танловда голиб чиқибди, сентябрдан ўқишни Америкада давом эттиаркан. “Бахт” - деганлари шу бўлса керак-да!

ИЗТИРОБ

Бугун бутун қишлоқдаги бир хушхабар Назокат ўқитувчига ёқмаган эди. У бу хабарни эшигтан заҳотиёқ ранги оқарди. Зўрга уйига кириб келди-да, юмшоқ ўринга чўзилди. “Наҳотки Фарҳод ўқишига кирган бўлса?! Яна қаерга денг, “Хуқуқшунослик“ қа-я?!!“ У ўзининг қилмишини хаёлига келтирди. Қанчалар шармандалил.

Назокат опа мактабда она тили ва адабиётидан дарс берар, Фарҳоднинг онаси Лобар билан бир синфда ўқиган синфдошлар эди. Аммо Лобарни у бир тийинга олмас, тирикчилик ташвишлари эзиб қўйган синфдошига қиё ҳам боқиб қўймасди. Ўғли Фарҳод аъло баҳоларга ўқиса-да юпунгина уст-боши кимларнингдир назарида иқтидорига соя ташлагандай эди. Айниқса, Назокат ая Фарҳодни барчани олдида уялтириб “Онанг уст-бошингга қараса бўлмайдими?”, - дерди. Ўртача ўқийдиган Сурайёни синфнинг олди бўлишини жуда-жуда хоҳларди. Чиндан Сурайё чиройли, озода қиз. Бироқ билим борасида Фарҳоднинг олдида ип эшолмаслиги аниқ.

Фарҳод битирувчи синф бўлгани учун жон фидо этиб ўқирди. Орзулари баланд. Мақсади эса битта. Олий ўқув даргоҳига кириш. Мактабни аъло баҳога битириши аниқ. Бироқ бечора Фарҳод чучварани хом санаган экан. Давлат имтиҳонини топширган Фарҳод она-тили ва адабиёт фанидан уч олганини кўриб, ҳайрат исканжасида қолди. “Бундай бўлиши мумкин эмас!“ - деди пицирлаб. Чунки у мактабда

“Қизил аттестат” олишига ишонарди. Энди-чи?! Асло мүмкін змас. Аммо чиқмаган жондан умид“ У шундай деганча Назокат аянинг олдига кирди. Қошларини чимирған ая унинг устидан кулганча:

-Үқишга бориши ким қўйибди, сенга? Отанг колхозчи, онанг колхозчи. Үқиб нима бўлардинг?, - деди уялмай. Фарҳоднинг бошидан бир пақир қайноқ сув қўйилгандай бўлди, ўзиям. Лом-мим демай ташқарига отилди. Ўртага анча одам тушса ҳам Назокат ая фикрини ўзгартирмай туриб олди. Аттестатнинг қизили эса Сурайёга тегди.

Фарҳоднинг юраги алам ўтида ёнарди. Сабаби “Қизил аттестат” змас. Балким ота-онасининг ҳақоратланиши эди. “Наҳот айримларнинг бағри тошдан-да қаттиқ, - деди изтироб билан. Ахир ота-онаси колхозчи бўлса айбми? Ўғримас, ё бирорнинг ҳаққини юлиб кун кўрмасалар! Йўқ. Фарҳод ўз ота-оналаридан ҳеч қачон ор қилмайди. Улар тенги йўқ инсонлар. Онаси Назокат аядай дилозор змас!” Фарҳод илк бора ҳақсизлик исканжасида тўлғонарди. Ноҳақлик тошининг залвори оғир бўлишини ҳис этганди, у! Ўзидан ёмон ўқиган Сурайёга олқишлиар бўлганига хафа бўлгани йўқ. Аксинча суюнди ҳам. У негадир Сурайёни жуда ёқтиарди. Гарчи онаси ёмон бўлсада. У зўр бериб ўқишга тайёрланди. “Таваккал”, - дея ҳукуқшунослик институтига ҳужжат топширди.

“Ойнинг ўн беши қоронғу бўлса-да, ўн беши ёруғ”, - деганлари рост экан. Фарҳод энг зўр даргоҳнинг талабаси бўлган эди. Аммо Сурайё институт остонасидан ортга қайтди.

Лекин Назокат бу дамда қизини ўйламас, Фарҳоднинг олдида юзи шувутлигидан уяларди. “Энди нима қиласди. Лобарнинг кўзига қандоқ қарайди”. У илк бора ўзига разм солди. “Қанчалар пасткаш эканман-а? Ёшлигига дугона бўлган Лобарни “колхозчи” - деб оёқ учида кўрсатибман. Ҳатто кўришгани узатган қўлларини олмаган кунларим ҳам бўлган. Бечора Фарҳодни-чи? “Усти хароб”, - деб хўрлаганларим, фақат қизимни кўз-кўз этишга интилганларим Мана “тегирмон навбати билан экан”. Энди Фарҳод талаба. Эртага эса юрист бўлади. Қандай юзига

қарайман, уни?" У чиндан ҳам ўз қилмишидан пушаймон эди, шу дам. У Фарҳод юрист бўлиб назарга илмай кетишидан қўрқмас, фақат шу дамгача инсонийлик туйгуларидан йироқ эканлигига ачинар, кибр дунёсига гарқ бўлиб қолган кунларига лаънатлар ўқирди. Қизарган кўзларини ёстиқка босди. У биринчи бора қалбидаги ҳисларга, балки виждони айбловларига қулок тутиб йиғлаётган эди.

ГУЛСУМ МОМО

САРАТОН қуёши атрофга аямай нур сочади. Қовжираган ўт-ўланлар бошларини эгганча ерга қапишиб олгандай. Аммо ариқни тўлдириб оқаётган сув қиргоққа бош уриб шилдираб оқиб ётибди. Кўзлари бироз хиралашган Гулсум момо ариққа энгалиб челакни тўлдириб сув олди-да, каттагина харсанг тош устига ўтириди. Ажин босган юзлари анча сўлгин. Кўзлари ҳам маъносиз, бир нуқтага тикилиб қолгандай, гўё! Атроф жим-жит. Фақат шаббодада оҳиста бош чайқаётган мажнунтол шивирию ариқдаги сувнинг шилдираши қулоққа чалинади. Момо узоқ ўтириди. Кейин чукур "үф" тортди-ю, хаёли бир зумгина ўтмиши томон олиб кетди.

Ўшанда ҳам ёз эди. Гулсум момо юрса оёғидан ўт чақнайдиган ёшгина көлинчак. Эри Мамарасул колхозда ҳисобчи, ўзи зса бригадир, пахта деса жонини беради. Иссиқ-совуқ демай ишлар, кўл остидагиларни ҳам тинмай ишлатарди. Аввалига уни ҳамма ҳурмат қила бошлади. Аммо раисбуванинг тинмай олқишилаши-ю, турли мажлислардаги зытибори уни тобора ўзгартиради. Айниқса кўксига битта орден таққанидан сўнг босар-тусарини билмай қолганди. Аввал ҳурмат қилган одамлар энди ундан чўчир, сал ўзини у ёқ-буёққа ташлаганлар зса Гулсумхоннинг қаҳрига учаради. Айниқса, хотин-халаж бутунлай юрак олдириб қўйдилар. Бирор кимса ундан ўтиб кийинишга ботинмас, ҳатто у кийган кўйлакдан бирор нусха кийиш ўлим билан тенг. Улдирмаса ҳам улгандан баттар қиласарди, у!

Тўйи ўтганига эндиғина тўрт ой бўлган Санобар Гулсумхоннинг бу савилни кийганини билмай шартта тикиб кийиб олади. Бу атлас Санобарга шунчалик ярашган эдики, хотин-халаж Гулсумхоннинг қаҳридан ҳам қўрқмай унинг атрофида парвона бўла бошладилар.

- Вой айланай, бунча чиройлик бўлмаса-я, - деди ҳайратланган Лобархон унинг устидаги атласни силаб. Санобар эса кулганча:

- Латиф акам олиб келган эканлар, кийиб ол деб қўймадилар-да! Юзларидан ўта олмадим. Шартта тикдиму, кийиб олдим.

- Жуда ярашибди ўзингизга, Санобархон. Худди узукка кўз қўйгандай.

Аммо шу пайт Лобархон бургут чангалида қолган чумчукдай атрофга аланглаб қаради.

- Вой, айланай. Тез бўлинг. Бу матоҳингизни уйга бориб ечиб ташланг. Йўқса, шўрингизга шўрва тўкилди деяверинг. Анави, кузгун ҳам худди шундақасидан кийган-а?!

Санобарнинг ранги оқарди. Оёғига қалтикроқ киргандай. Ахир бу ҳазил гапмас. Гулсум опа кўрсами, урди худо. Наҳот ўша кийганини билмай қолган бўлсам? Атрофдаги хотинлар ҳам бу сўздан кейин ҳушёр тортдилар. Индамайгина тарқалиб кетишиди. Санобар эса уйи томон ошиқар, бўрининг чангалига тушиб қоладигандай илиги қалтирасди. “Намунча уйи узоқ бўлмаса-я? Боягина йўл бўйига қандай чиққанини билмаганди. Энди-чи? Қадамини теззатгани сари йўли унмайди-я?! Ҳозир келиб қолсами? Йўғ-ей! Унақа бўлмас. У яна бир бор ортига қараб олди. Қарадиу, тахтадек қотиб қолди, ўзиям. Ортидан оқ “Волга” қушдай елиб келарди. У ёғини айтиш оғир.

Гулсумхон худди шу пайт туман марказига йигилишга йўл олганди. Устида ял-ял ёниб турган саккиз тепки атлас. Ўзиям атласмисан, атласда. Гулсумхонни ҳам худо хусндан қисмаган, кўчадагилар қадди-қоматига суқланиб қараб қўйишарди. Айниқса раисбува Гулсумга ўзгача меҳр қўйган. Унинг қаттиққўллиги-ю, эркалиги ҳам раисбуванинг ортидан. Мана бугун ҳам раиснинг сутдай оппоқ “Волга”сига ўтириб

туман марказига қараб йўл олди. Аммо оёғи тагидан фалокат чиқишини қайдан билибди дейсиз? Йўл бўйида атласда лов-лов ниб кетаётган Санобарни кўрди-ю, миясига қон қўйилгандай бўлди, гўё! “Латифнинг хотиними?” - деди ғазаб билан ҳайдовчига. Ҳайдовчи ҳам Гулсумнинг феълини билар, мудҳиш воқеа юз беришини сезгандай юраги “шув” этди.

- Билмадим, - деди ғўлдираб. Гулсумнинг эса фигони фалак. Фиқ этиб тўхтаган машинадан тушди-ю, даг-даг титраб турган Санобарнинг ёнига келди. “Латифжоннинг хотини”, - деди ичида. Кейин ғазаб билан ҳайдовчига бақирди.

- Боқи, буёққа кел.

Боқи учеб келди, унинг ёнига.

- Бу ойимчанинг кўйлагини ечиб ол, - деди ғазаб билан. Бечора йигитни ток ургандай эди. Бироз ғулдираганча:

- Гулсум опа, бу нимаси? - дея олди. Аммо ўёғига тили айланмай қолди. Гулсумхон - унга қиргийдай ўткир кўзларини қадаб туради. “Тамом. Энди бу жодугар: уни ҳам тинч қўймайди. Агар ҳозир айтганини қилмасам ҳолимга маймунлар йиглаши аниқ. Раисбува орқали тинчтиб юбориши ҳеч гапмас-а? Ахир жонимдан тўйганим йўқ. Кўйлак ечиш бўлса ечамиз-да. Аммо, бегуноҳ аёлни...”.

Гулсумхоннинг кўзига шу дамда ҳеч нарса кўринмас, уни масхара қилган, менсимаган бу аёлнинг тезроқ таъзирини бериб қўйишни ўйларди, холос. Буйруғига бўйсунмай турган бу йигитча ҳам энди қаҳридан четда қолмаслиги аниқ эди.

Боқи қўрқиб кетиб Санобар томон юрди. Бечора келин опани “ҳазил қиласпти” деб ўйлаган эди. Аммо Боқининг ўзи томон келаётганини кўриб нафаси қиса бошлади. Ичида нимадир узилгандай бўлди. Унинг икки ойлик ҳомиласи бор эди, қорнида. Шу дамда қўрқув боис ўз жигаргўшасидан айрилганини билмас, уят ва номус олдида қалт-қалт титрарди.

- Гулсум опа, кечиринг, - деди ялиниб у. Аммо барчаси бекор. Боқи ўзи хоҳламаса ҳам аёл қўйлагига чанг солди. Санобар Гулсумдан бирор нажот йўқлигини билиб қоча

бошлади. Аммо абжир йигит бир сакраб унга етиб олдию, кўзларини юмганча лов-лов ёниб турган атласни чок-чокидан йириб ташлади. Бундан кўнгли тўлган Гулсумхон оппоқ “Волга”га ўтириб марказ томон йўл олди.

Номус исканжасида қолган бечора Санобар боягина яшнаб турган атлас йиртиқларидан яққол кўриниб турган баданини яширишга ҳаракат қилас, юм-юм йиглаб Гулсумга лаънатлар ўқирди. Кимдир унинг устига юпқагина рўмол ташлади. Судралганча ўрнидан турганди, белидаги оғриқдан “дод”, - деганча ўтириб қолди. Уни кўтариб уйига элтиб қўйдилар.

Латиф ҳеч нарсадан бехабар уйига етиб келганида атрофга қоронгулик тушган, доим дарвоза тагида кутиб оладиган севимли Санобари кўринмасди. Ҳайрон бўлиб ичкарига кирди. Кирди-ю, тахтадек қотиб қолди. Ҳовлидаги бир туп ёнғоқда Санобар осилиб турарди. Эгнида бугун кийган атласи пора-пора. Ёнида эса хат. У хотини томон интилди. Оёқларидан тутди. Муздек эди улар...

Ғазаб отига минган Латиф ярим тунда қўлига болта тутганча ҳайдовчи йигитнинг уйи томон йўл олди. Бечора Боқи ҳам у ёғига, бу ёғига ағдарилиб ухлай олмас, ёш жувоннинг аламли овози қулоги остидан кетмай қийнарди. Хотини ҳам эрининг безовталигидан ҳайрон. Кўп ўтмай ташқарида нимадир шитирлагандай бўлди. Ва Латиф Боқи томон Бўридай ташланди-ю, қўлидаги болта билан дуч келган жойига ура бошлади. Тунда келган бу фалокатдан тош бўлиб қолган хотин бечора на бақирди, на қоча олди. Шофёрнинг тинчib қолганини кўрган Латиф Боқининг хотинига кўзи тушди-ю, қонга беланган болтани баланд кўтарди. Кўзларида даҳшат қотган бечора хотин нима гаплигини билмай тилдан қолгандай эди, гўё! Бироқ Латифнинг болта кўтарган қўллари секингина пастга тушди. Ва кўркув исканжасида ётган хотинга бир қараб қўйганча ташқарига отилди.

Латиф ўша қўлидаги қонли болта билан Гулсум опанинг уйига етиб келганди. Аммо ичкарига киришга юраги дов бермади. Шундоқ ҳам иликлари қалтирас, бир пайтда иккиси

ўлик күрган күзлари даҳшат исканжасида. Санобарнинг муздек оёклари, ёшгина йигитнинг қонга беланган мурдаси кўнглини бехузур қиларди. Унинг кўзлари тиниб юзтубан ерга йиқилди.

Юзлари ажин босган Гулсум момо қаётган сув томон тикилиб, ўтмишнинг аянчли манзараси олдида мунгайиб қолганди. Ўша тонг даҳшатли тонг эди. Шундоқ эшиги тагида қонли болта билан ҳужсиз ётган Латифни аввал шифохонага олиб кетишиди, сўнгра қотилликда айблаб, умрбод озодликдан маҳрум этдилар. Ёшгина икки вужуд бевақт хазон бўлди. Аммо ҳеч ким Гулсумга теккани йўқ. Барига ўзи сабабчи эканлигини билар, виждон азоби тинчлик бермасди, унга. Шу сабаб милицияга айбдор эканлигини тан олиб мурожаат этди. Аммо Латиф... У чиндан мард эди. Ҳаммасига айбдор Гулсум эканлигини билса-да, барчасига ўз елкасини тутиб кетаверди.

Гулсум опа! Уч фарзанднинг онаси эди. Кўп ўтмай тўнгич ўғли касал бўлди-ю, бир ҳафтада уни ерга топширди. Сўнг қизи ҳам вафот этди. У энди кичик ўглидан юрак ҳовучлаб яшар. У бирор кимсага ишона олмасди боласини. Аммо ўғли тўғри йўлда йиқилиб туролмайдиган бўлиб қолди. Онаизор салкам эллик йилдан бери боласи бошида парвона... Инқиллаб, синқиллаб сув ташийди, овқат пиширади. Унинг ўтмиши одамлар ўртасида унутилиб кетган бўлса-да, “Қарғиш теккан бандаман”, - деб бирор кимсага қўшилмас, кўчадаги болалар эса. “Жодугар” - деб ундан қўрқишарди.

Худди шу пайт ариқ бўйида бир тўп болалар пайдо бўлди.

- Ия, Зокир, ариқка яқинлашма, - деди улар орасидаги кимдир. Жодугар кампир шу ерда экан. Қоч, қоч...

Бу сўзларни деярли шивирлаб айтдилар. Аммо Гулсум момо уни аниқ эшилди. Юраги санчди. “Эй худо!”, - деди пичирлаб. “Бу азоблардан қачон халос қиласан. Қарғиш урган бандангнинг тезроқ жонини ол!”. Аммо ажал ҳали-

вери шошадиган эмасдек.

Гулсум момо судралиб кетиб борарді, ортидан бир түп бола құрқанича тикилиб қолиши.

ҚҮРИҚЧИ

ҮЛМАС кампир қишлоқнинг юраги. Тўй-маъракалар у сиз ўтмасди. Кекса-ю-ёшга маслаҳат берган, у, бузилган оиласларни тиклаган ҳам, аразлашгандарни тиклаган ҳам Ўлмас кампир. Аммо худо уни бир томондан қисган. Бефарзанд. “Бир кам дунё!”, деганлари шу бўлса керакда. Шу сабабли, кўчанинг боласи бари кампирнинг уйда. “Қий-чув”, қилиб ҳовлини бошига кўтаришса ҳам уларга бирор оғиз қаттиқ гапирмайди. “Айтишларича, унинг тўққизта боласи бўлган экан. Аммо улар қирқи чиқмай ўлиб қолганмиш”. Яна ким билади, дейсиз? Кампирни каттакон ити ҳам бор. Туни-кун ёнида. Тўйга борса ҳам, азага борса ҳам. Қишлоқ аҳли унга “Қўриқчи”, - деб ном қўйиб олишган. Ҳуллас бир воқеа содир бўлдики, бутун қишлоқ ларзага келди. Ва ўша қўриқчининг бошини силаб, “раҳмат” айтди барча.

Ўша куни Ўлмас кампир маҳалладаги Сора бувиникига келди-да, узоқ-яқиндан гаплашиб ўтириши.

-Вақт ҳам ўтаверар экан-а? - деди хўрсиниб Ўлмас кампир.

-Нимасини айтасан, Ўлмас! Умр деганлари зувиллаб ўтиб кетибди. Эсимизни танигандан буён қанча одам дунёдан ўтиб кетди мана, сену мен ҳам қаридик.

Улар шу тарзда узоқ сұхбатлашиб ўтириши. Кунни кеч қиласай деган Ўлмас кампир кетгиси келмагандай ўрнидан турди. Негадир биринчи марта уйига боргиси келмаганди, унинг. Шундай бўлса-да, бироз энкайганча уйи томон кетди. Ёнида эса “Қўриқчи” думини осилтириб олганди. Негадир доим ўйноқлаб турадиган ит бугун хомушдай.

Ўлмас кампир уйга келдию, бироқ ҳеч ўтиргиси келмай яна ташқарига чиқди. У биринчи бор ёлғизликдан ззилаётган эди. Бир пайтлар бу ҳовлига ёр-ёр садолари остида келин

бўлиб келганди. Чоли раҳматли билан қирқ йил бирга яшашди. Худо уларга фарзанд берди-ю, қўлларига ушлатмади. Бир-биридан ширин тўққиз ўғил қирқи чиқмай кетаверди. “Во дариг!” Бу айриликлар эр-хотиннинг бағрини ўйди. Эрининг қаддини буқди. Охир-оқибат ғам адо қилди, уни. У ҳам Ўлмасни ташлаганча кетворди. Аммо Ўлмас номи ўзи билан ўлмас экан. Борига чидади. Ўлмади. Қишлоқнинг корига яраш насиб этди, унга. Ана ўшалар фарзанди, унинг. У шу дамда илк бор ёлғизликнинг бутун даҳшати билан ҳис этаётганди. Юраги сиқилиб, дала томон кетди. Бироз у ерларни айланса, юрагининг чигиллари ёзилар. Маккапоялар ичига кирди. Думбулларни қайира бошлади. Аммо шу дам боши айлангандай бўлди. Уфқ қизариб, қуёш ботаётган эди. У ҳам тескари бўлиб қолгандай, гўё. Воажаб, ажал Ўлмас кампирга сездирмай келганди. Унинг лаблари пичирлай бошлади. “ла илаҳа иллаллоҳ”. У уч бора калимасини келтиришга улгурди. Сўнг жўяқ ичига бош қўйди.

Атрофни қоронгулик қоплаган. Қишлоқда изғиб юрган мушуклар галаси ҳид олиб дала томон келарди. Аммо “Қўриқчи” нинг важоҳатли кўзлари уларга ғазаб билан тикилди. Улар ортга чекинишиди. “Қўриқчи” Сора кампирни уйига чопди. “Эганг қани?” деди Сора кампир итга кўзи тушиши биланоқ. У билардики, доим эгаси билан келарди. Аммо... Ҳозир у ёлғиз!

Сора кампир ва унинг ўғиллари “Қўриқчи”нинг ортидан зргашдилар. Не кўз билан кўришсинки, Ўлмас кампир кулимсираганча мангу уйқуга кетганди.

Азага бутун қишлоқ йифилди. Тобут қўлма-қўл бўлиб кетди. Ҳамма Ўлмас кампирни сўнгги йўлга кузатгани чиққан. Эшитганки, тобутни бир бор ушлаб, савоб олишга уринарди.

“Қўриқчи” ҳамон кампирнинг ёнида. У шунча одамлар орасида кўзга ташланмаса-да, у билан ёнма-ён борарди.

Сўнгги манзил. Одамлар кампирни бу ерга кўйиб ортга қайтилар. Аммо “Қўриқчи” ҳамон дўппайган қабр олдида қолди. У Ўлмас кампирни тириклигига қўриқлагандай, қўриқлаб турарди.

ТУШЛАРИМГА КИРМАНГ, ДАДАЖОН

Түн... Осмонда юлдузлар пориллаб нур сочади. Яримта ой қиличдай ярқираб турибди. Узоқдан чириллаётган чигиртканинг овози бутун қышлоқни тутган бұлса-да, соchlари жамалак, күzlари охуникидай қизчанинг у билан иши йўқ. Унинг кўзлари олис осмонларга қадалган. Хаёллари эса юлдузлар билан баробар. У чуқур хўрсишиб қўиди. Унинг жажожигина юрагини алам ва изтиробнинг чирмоғиқлари чирмаб ётарди. “Нега?”, - деди у пичирлаб. Кейин кўзларидан пилдираганча икки томчи ёш оқиб тушди. У бугун кундузи бўлиб ўтган воқеадан кўнгли чил-чил синган зди.

Биринчи қўнғироқ. Нигора бу кунни узок, энтикиб кутдй. У худди шу куни бахтиёр·бўлишини сезар, тушларида ҳам оппоққина от қанотида учиб юргандек туюларди. Рост-да у етти ёшга тўлди. Биринчи марта мактабга боради! Аммо у учун янада қувончли бир нарса бор. Айнан шу куни унинг меҳрибон дадажониси кўргани келар экан!!! Нигора ширин энтикиб қўиди. Кўзларини юмганча тасаввур этди.

Ясining айтишича дадаси жуда чиройли эмиш. Қошкўзлари худди ўзига ўхшар экан. Аммо... Нигора ўйланиб қолди. “Нега аям билан дадам бирга яшамас экан-а? Ахир Зарнигорнинг дадаси доим уйларида. Бирга яшашади. Қизининг қўлидан етаклаб боққаям олиб бориб туради. Мени-чи? Дадам бир марта қўлларимдан етаклаб юрганими? Йўқ! Ҳатто бирор марта кўрганиям келган эмас. Ё менинг дадам шунчалик ёмонми? Йўқ, йўқ, яхшилар!!! Дадам ҳаммадан яхши. Фақат узоқ-узоқдалар-да! Ишлари жудаям кўп. Лекин мен мактабга чиқсан куним албатта келар эканлар. Ўшанда бўйинларига осилиб оламан. “Дадажоним!”, - дейман эркаланиб.

Нигора шу ўй-хаёллар билан кунни санаб ўтказа бошлади. Ҳатто тушларида ҳам кўриб чиқди биринчи қўнғироқни.

Оппоқ кийимда эмиш. Атрофи тўла гуллар. Аяси қўлидан етаклаб олибди. Шунда узоқдан худди ўзига ўхшаган

дадаси пайдо бўлганмиш. У Нигоранинг ёнига келибди-да, шартта кўтариб олибди. Уйгониб қараса, туши. У курган тушини аясига айтиб берди. Аяси эса хўрсинганча:

-Даданг келса, маҳкам қучоқлаб олгин-а, Нигора. Кейин қулоғига “Биз билан қолинг”, дегин, ҳеч кимга билдирамай айтгин, - деди. Аясининг кўзлари тўла ёш эканини кўриб қўрқиб кетган Нигора:

-Аяжон йигламанг, - деди шошганча.

Шу тарзда кунлар ўтди. Нигоранинг хаёлида бир ўй. “Дадам келса, албатта олиб қоламан. Бирга яшаймиз”, - дерди қувониб.

Илк бор мактабга қадам қўйган Нигора шу қадар хурсанд зди-ки, ўзини қўярга жой тополмас, аясининг юзидан ўлиб, бўйнидан қучоқлаб-қучоқлаб оларди. У ҳамма қизлардан чиройли зди. Шу сабабми биринчи қўнгироқни чалишга уни танлаб олишди.

Ўзидан катта, келишган Аброр ака уни елкасига ўтқазиб олди. Ҳаяжонли онлар, безатилган қўнгироқчани маҳкам ушлаганча атрофга боқарди. “Дадам келдимикан?” - деди пицирлаб. У қўлларида гул тутиб турганларга синчиклаб қаради. “Ана Зарнигорнинг дадаси ва аяси ёнма-ён турибди. Улар бирам хурсандки. Уф, аям қаерда экан. Ҳа, ҳа аналар аям!” Нигора “дод”, - деб йиглаб юборай деди. Аяси бир ўзи қўлида гул тутганча унга тикилиб турарди. “Дадам келмабдилар, - деди у хўрсиниб. Аям бечора бир ўзи турибди-я! Ҳамманинг дадаси келган. Аммо менинг дадам йўқ. Қизимнинг биринчи қўнгироғига бораман, - деб қўшниларга айтган эканлар. Лекин ваъдаларининг устидан чиқмадилар. Аям бечора ҳам “даданг келади, қизим!”, - деб хурсанд бўлгандилар. Афсус...”

Худди шу дамда Нигора юрагида нимадир “чирт” этиб узилгандай бўлди. Тушларида эркаланиб юрган дадасини худди шу дамда ёмон қўриб қолганди. Кимдир “Нигора қўнгироқни чал”, - дегандай бўлди. Бироз ўзига келган Нигора қўлидаги қўнгироқни маҳкам ушлади-да, зарб билан чала бошлади. У шу дамда барча аламларини қўнгироқ жарангига тўкиб solaётган зди.

“Дадам ёмон одам! У аямни ташлаб, бошқа аёлга уйланиб олган. Ҳатто мени ҳам ёмон кўради”, - дерди пицирлаб. Гўё қўнғироқ тилида жарангларди, бу сўзлар! Осмону фалакларга учарди, Нигоранинг қалбидаги фарёди. Унинг кўзларидан ёш оқар, қалби изтироб қучогида тўлғонарди. У биринчи бор дугонаси Зарнигорга ҳаваси келди. Унинг дадаси елкаларига кўтариб олганди, Зарнигорни.

Худди шу дам аяси бир қучоқ гул билан Нигоранинг ёнига яқинлашди. Қизалоқ тезда кўзидағи ёшини артди. У аясининг шундоқ ҳам ўксисб турган қалбига озор беришини хоҳламасди. “Ўзимнинг меҳрибоним” - деганча аясининг бағрига отилди.

Юлдузларга термулган Нигоранинг хаёлидан худди шулар ўтди, маржондай тизилганча. Яримта ой энди ухла, дегандай деразадан четлашди. У шаҳло кўзларини бир юмиб олди-да, “Энди тушларимга кирманг, дадажон”, - деди пицирлаб. Ва аяжонисининг пинжига кириб кўзларини юмиб олди.



МУНДАРИЖА

Армон.....	3
Оппоқ кабутар.....	6
Түхмат тоши.....	9
Иэтироб.....	12
Гулсум момо.....	14
Қўриқчи.....	19
Тушларимга кирманг, дадажон.....	21

Машҳура УСМОНОВА

ОҚ КАБУТАР (Хикоялар)

Муҳаррир: А. Жаббор

Техмуҳаррир: Н. Жабборов

Мусаҳҳиҳ: Д. Эргашева

17.09.2005 йилда теришга берилди. Босишга 22.09.2005 йилда
руҳсат этилди. Бичими 60x84 1-16. Ҳажми 1,5 босма табоқ.
6102-буюртма. Адади 1000 нусха.

"Фарғона" нашиёти.

712014. Фарғона шаҳри, Соҳибқирон Темур кўчаси, 28—уй.

Ибрат номли босмахона ОАЖ. (Наманган шаҳри, Навоий кўчаси,
36—уй) да чоп этилади.